

Sjernarøy herad.

Nord-Hidle, gards nr. 12.

Sendar: Johannes Hidle.

Emne nr. 11.

## Ymse attåt-for.

- I. Röter ikkje brukt som for det eg kjenner til her. Det einaste eg har høyrte gjete er at tröska kunde verta nytta, men eg har aldri sett det.
1. Dei sanka ikkje röter til krötermat, ikkje det eg har sett eller høyrte her.
  3. Eg har høyrte um at sume skal ha nytta tröska, trauska, til dyr, men ikkje veit eg meir um det.

B. Bregner heller ikkje nytta til for det eg veit um.

## II. Tang og tare

Taren kunde sauene eta på, serleg lika dei marlauken, dette lange smale sjögraset som veks sume stader og driv i land vinters tid. Sauene gjekk sjölv i strandi og fann det, og annan tare og åt, dei lika det. So var det visst skikk at grisene fekk tare, eg har ikkje sett det brukti mi tid, frå 1885-åri. I mi barndomstid skar dei tare, helst til hevd, med ein lja med langt skaft på, det var um våren. Elles samla dei tare i vikane etter storm, dei köyrde den heim og hadde under sauene og öykjen i stallen.

1. Ikkje tare til for her no.

## III. Andre planter til for.

At dei nyttar etreris er vanleg, men det er lite av det her. Anna kjenner eg ikkje til brukt.

## IV. Hestemök til for heilt ukjent her.

## V. Sörpefor.

I eldre tid mykje brukt verma vatn til kyrne, og då var det vanleg til mjölkekyrne å leggja uppi vatnet anten litt jordeplekål eller hå. Likeso kunde dei slå varmt vatn på agner, eller seinare hakka hakn, og so attpå noko mjöl på, både til kyr og pykjer. Hadde dei ikkje noko å laga log av, kunde dei ha litt mjöl på drikka, helst av havre, seinare og klid eller anna kraftfor. Etter kui hadde kalva fekk ho gjerne litt varmt drikka med mjöl på. No helst kaldt vatn, og dei lagar til hakk eller anna som dei byter i vassrenna åt kyrne.

1. Ikkje koka vatn eller sörpa lenger. För dei bruka det, hadde dei det i ei trebytta, vatnet vermt i ei stor gryta.
2. No nytta blöyta foret, men i renna framfyre kyrne, både hakk og agner og anna, med litt mjöl på, anten havremjöl eller og ymse kraftfor.
3. Varmt berre i visse höve, etter kalving t.d. Og i sjukdom.
4. Raunebar lite og inkje nytta, det måtte vera til höns, um det var.
- 5 og 6. Drank og mash ukjent her avdi ein ikkje bryggjar.
7. Dei nyttar höyfræ og för jordeplelav, no det siste slutt, medan dei enno nyttar höyfræ og agner og anna.

VI. Fiskeavfall ikkje brukt her til for anna enn dei kan kjøpa sildeavfall til sauene og brukalitt salt silde til kyrne, serleg når dei er ute. Dei tar då ei sild kvar.